



Apeqquteqaat aallaavigalugu oqallisissaq, qanoq iliorluni piujuaannartitsineq tunngavigalugu takornariaqarneq ineriartortinneqassava?

(Inatsisartunut gruppiat, Inuit Ataqatigiit)

Qujanaq siunnersuummut, maani nunatsinni takornariaqarnerup ineriartorneranik oqallinnissamut periarfissiisumut.

Imaappasippoq, tamatta neriuteqartugut, nunatsinni takornariaqarnerup aningaasarsiornikkut sukarsuunissaa. Tamanna pisariaqartipparput. Ullumikkummi imaamat, maani nunatsinni isertitat annerpaartaat aalisarnermit Danmarkimiillu bloktilskuddemit pisarmata. Anguniagarisariaqarparput, bloktilskuddimik isumalluuteqartuarnerup appartinnissaa ingerlatanit assigiinngitsunit isertitat annertusinerisa malitsigisaannik.

Demokraatit isumaqarput, takornariaqarnermit isertitat annertusinerisa aningaasaqarnerup pitsanngoriarneranik bloktilskuddinillu isumalluuteqarpallaarunnaarnissaput qulakkeersinnaagaat. Taamaattumik ukiorpassuarni sorsuutigisimavarput takornariaqarnerup pitsaanerpaamik sinaakkuteqarnissaanik pilersitsinissaq. Ilulissani Nuummilu mittarfissarsuarnik pilersitsinissanut siuttuujuarsimavugut, taakku qularnanngilluinnartumik takornariaqarnermut siursaataasussaammata. Taamaapporlu Tasiilami nunap immikkoortuani mittarfiliortoqarpat, tassungalu uagut aamma isumaqataavugut.

Qularnanngilluinnarpoq, Kalaallit Nunaat takornarianut pilerinartuusoq. Avatangiiserput avatangiisitsinnilu misigisassat immikkuullarilluinnarput, takornarissat misigerusuttagaat, akilerusuttagaallu. Taamatullu eqqarsaatigisariaqarparput, avatangiiseq qajannartuummat. Taamaattumik, takornarianut pilerinartuaannassappat, paarilluartariaqarparput. Aamma eqqarsaatigisariaqarparput, illoqarfiit ilai takornarissat nalaani ima ornigarneqartartigimmata, uagut – nunaqavissut – misigisimalersinnaalluta, ikinnerussuteqartutut. Tamanna nalunngilara nammineq illoqarfinniit Ilulissaniit. Tassanilu eqqarsaatigisariaqarpoq, Ilulissani mittarfissarsuaq suliluunniit ammanngippat, tamannalu isumaqarluni, takornarissanik onigarneqarnerup suli annertusinissaa naatsorsuutigisariaqartoq.

Taamaattumik takornarissat amerlinissaannut pitsaasumik pilersarusiorlutalu iliuusissatut pilersarusiorneq aallartittariaqarparput. Misigittaakannersumik eqqarsartariaqarpugut, qanoq annerpaamik takornarissamit ataatsimit isertitaqarsinnaanerluta taamatuttaarlu pineqartup pitsaasumik pisigisaqarnissaa qulakkeerlugu. Tamanna pissaaq, uatsinnut avatangiisitsinnullu paarsinitta saniatigut. Suliassaaq oqittuinnaassanngilaq.

Paasisariaqarparputtaaq, takornariaqarneq politikikkut aqussannginnatsigu. Maanngaanniit pitsaanerpaamik sinaakkusersuissaagut, takornariaqarnermi ingerlatsisut pitsaanerpaamik



immersugassaannik. Demokraatit tamanna tunngavigalugu isumaqarput, pingaartuusoq, pilersaarusiornissat iliuusissanillu pilersaarusiornerit takornariatitsisut qanimut suleqatigalugit suliarineqarnissaat, sinaakkutinik malittarisassanillu piviusorsiortuunngitsunik, pilersitsinnginniassagatta.

Tamatta siammasissumik isumaqatigiissuteqarnissamik pisariaqartitsineq oqallisigisorujussuarput. Uanilu eqqartorparput, qanoq pingaaruteqartigisoq siammasissumik isumaqatigiissuteqarnissaq – Maani Kalaallit Nunaanni inunnut, avatangiisinut aningaasaqarnermullu tunngatillugu.

Tassalu oqallinnermut Demokraatit oqaaseqaatigerusutaat.